

BRACCESI (Alessandro)

CARMINA VARIA (139 vers)

AD CAMILLAM SARACINAM SENENSEM

CV_1 v.1 Ponat amor pharetram maestus frangatque sagittas,
 2 ac tenera plangat pectora nuda manu,
 3 et doleat tristis passis Citherea capillis,
 4 delicias ploret casta Minerva suas ;
 5 cesset et omnis honor, cultus valeatque Senensis,
 6 et matrona simul lugeat atque nurus,
 7 usque puellarum coetus, quin tota inventus,
 8 certatim lacrimis abluat ora gemens :
 9 Heu, Saracina, decus splendorque et gloria formae,
 10 pulchrius in vestra qua fuit urbe nihil,
 11 infelix visu capta est, miserabile dictu ;
 12 sic ne vacare deos, heu, pietate decet ?
 13 Quidnam erat in terris oculis formosius hujus ?
 14 Quid magis his poterat par fore syderibus ?
 15 Hos obscura tamen caligo ac densa recondit,
 16 nec caelum aut terras posse videre sinit.
 17 Quod scelus auditum majus, quod saevius isto ?
 18 Quid Sena, quid potuit tristius esse tibi ?
 19 Sed major jactura fuit tua, saeve Cupido :
 20 hujus erant oculi retia nanque tua.
 21 Nil tibi nunc superest, quo vincula nectere possis,
 22 ut prius, in juvenes, quos Sena pulchra fovet.
 23 Nunc et abest omnis penitus jucunda venustas,
 24 nunc reliqua est Veneri gratia nulla deae,
 25 nunc quoque moeret iners, artes quae docta Minervae
 26 callet, quod tenebrae lumina clausa tenent.
 27 Ergo, Cupido simul Venus et Bellona parenti
 28 fundite devotas, heu, sine fine preces,
 29 lumina restituat donec formosa Camillae,
 30 hanc, prius ut poterat, posse videre sinat.

PSALMUS IN QUO FILII IMPRECANTUR ADVERSUS PERSEQUENTES PATREM EORUM,
 CARCERIBUS DETENTUM ET TORMENTIS AFFECTUM

CV_2
 v.1 Audite gentes clamorem nostrum et miseremini calamitatumstrarum.
 v.2 Eripite pauperem et egenum et de manu peccatorum liberate eum.
 v.3 Defendite justum ab injusto ; humilem et pauperem justificare.
 v.4 Quia justum et pium diligit deus et implet benedictionibus facientes misericordiam.
 v.5 Beatus qui liberat pauperem a potente et pauperem, cui non est adiutor, defendit.

- v.6 Ecce iniqui insurrexerunt contra ossa nostra et sinagoga potentium insidias paravit eis.
v.7 Circumdediderunt humilem vituli multi, tauri pingues obsederunt illum.
v.8 Adlatraverunt canes impii et os suum aperuerunt, ut devorarent eum.
v.9 Consilium malignantium damnavit innocentem afflictum et humiliatum nimis.
v.10 Ecce quomodo ab injustis persecuti sumus : quis de manibus eorum nos eruet ?
v.11 Quia multiplicatus est super nos furor eorum, et sanguinem nostrum sitiverunt.
v.12 Ecce despecta est caro nostra et oculi nostri ingemunt prae inopia.
v.13 Patrem nostrum. Oppresserunt peccatores et humiliaverunt in compedibus.
v.14 In carceribus, in maerore et in luctu, in tenebris et in labore afflixerunt eum.
v.15 Animas nostras pertransivit ira inimicorum, error illorum conturbavit nos.
v.16 Laqueo conati sunt stringere guttur nostrum et sanguinem nostrum dispergere.
v.17 Quoniam iniquus homo surrexit, qui contra patrem nostrum exercet mendacium.
v.18 Lingua ejus sicut novacula acuta, cogitationes illius pessimae.
v.19 Propterea Deus disperdet eum in finem et radicem ejus evellet de terra viventium.
v.20 Et deducet eum in puteum, interitus et non erit qui misereatur.
v.21 Et irridebunt eum gentes et dicent : ecce homo qui abominabilis factus est in mendacio.
v.22 Sicut cera liquescit a facie ignis, sic deficiat generatio ejus pessima.
v.23 Contereantur dentes ejus et molae noxiae confringantur.
v.24 Abrevientur dies ejus pravi : fiant illi in confusione et dolore.
v.25 Filii ejus mendici fiant et orphani et corruat domus ejus tota.
v.26 Devoret fenerator omnem substantiam ejus et deducat in nihilum labores manuum suarum.
v.27 Quia persecutus est inopem et egenum et deduxit eum in aerumnas multas.
v.28 Sed tu, domine, miserere parvulorum ejus : impuberem et lactentem conserva.
v.29 Quoniam in te confidit anima nostra et sub umbra alarum tuarum confugimus.
v.30 Eripe nos de manu peccatorum et conculca improperantes nobis.
v.31 Protege nos ab operantibus injustitiam et de viris sanguinum absterge nos.
v.32 Quoniam pater noster oppressus est nimis, nos autem filii ejus parvuli et derelicti.
v.33 Ecce miseri facti sumus nimis et domus nostra plena est doloris.
v.34 Panem alienum manducamus cum lacrimis, sitimus et exurimus tota die.
v.35 Nudati sumus velut egentes et habemus sublevantem neminem.
v.36 Exaudi ergo, domine, deprecationem nostram et lacrimas nostras absterge.
v.37 Ut videant et cognoscant omnes, quia tu es justus et non derelinquis innocentes.
v.38 Et cantabimus misericordiam et rectitudinem tuam et adjutorium tuum per dies ac noctes.
v.39 Quia factus sis protector noster et refugium nostrum in die tribulationis.
v.40 Et ecce dicemus, quod in velamento alarum tuarum cepisti nos et dextera tua auxiliata est nobis.
v.41 Quoniam tu dominus altissimus et multum misericors, nunc et in saeculum saeculi.

PETRO MEDICI LAURENTII FILIO IN NATALEM FILII

- CV_3 v.1 Salve laeta dies tam magni nuntia partus
2 et felix tanto facta puerperio,
3 salve festa dies, quae maxima damna rependis,
4 morte sua patria quae pater intulerat :
5 civibus in cunctis luctus nunc publicus omnis
6 cessat et omnis abest justus ab urbe dolor.
7 Redditus est terris iterum Laurentius heros,
8 demissus certe sedibus e superis,
9 clarus avi qui facta sui, qui facta parentis
10 augeat, et mitis otia pacis amet,
11 et cum patre senex urbem seniore gubernet,
12 protegat et patriam, fortis, ab injuria.
13 Dii servate igitur natum, servate parentem,
14 ac date Nestoreos vivat uterque dies !

DE CASU ALEXANDRI SEXTI PONTIFICIS MAXIMI

CV_4 v.1 Sextus Alexander quam sit tibi carus in omni
 2 tempore, Virgo parens, protinus ipsa doces.
 3 Ecce, ruunt subito Eurusque Nothusque procellis,
 4 Pontificemque parant perdere, Virgo, tuum :
 5 nam quatiunt summo de vertice tecta Palati,
 6 quo cadat in sanctum dira ruina caput.
 7 Protegit ab alto sed eum tua dextera praesens,
 8 atque tuo est illi numine parta salus :
 9 sic servare soles cunctos discrimine ab omni,
 10 qui tua devoti sacra verenda colunt.

AD LUCAM FICINUM

CV_5 v.1 Est tibi caesaries ingens corpusque pusillum,
 2 sic ut sit major corpore caesaries.

AD EXCELENTISSIMUM DOMINUM FRANCISCUM DE SODERINIS CARDINALEM
FLORENTINUM IN ASSUMPTIONE SUA

CV_6 v.1 Gaudia quid faciant ingentia sensimus ipsi,
 2 experti nuper gaudia quid faciant.
 3 Nam, cum purpureo merito, Soderine, galero
 4 ornatus quod sis nuntia fama refert,
 5 gaudia nostra adeo tetigerunt corda repente
 6 insolita atque artus praeripuere meos,
 7 ut totum febris succenderit impia corpus,
 8 qua potui accinctam non superare necem.

ANTONIO CLEMENTIO ADREAE FILIO

CV_7 v.1 Quid tibi plus solito, Clementi, pallor in ore
 2 nam sedet et vultus tristis, amice, geris ?
 3 Quam male, quam vereor captus tenearis amore,
 4 uranturque gravi corda benigna face !

THOMAE BALDINOCTO

CV_8 v.1 Chartarum nuper veterum fragmenta volutans,
 2 Baldinocte, meum dulce sodalicium,
 3 invenio quae tu misisti carmina dudum,
 4 perpetuum nostrae pignus amicitiae,
 5 in quibus agnovi studium mentemque benignam
 6 usque tuam, Thomas, et vetus officium.
 7 Laudis enim tribuis tantum, super inclyta vexit
 8 astra viros quantum fama perexiguos,
 9 et celebris quantum mortalia pectora divis

10 Musa renascenti praetulit ingenio.
11 Maxima pars igitur nostri tibi debita juris
12 est, merito quo tu fungeris imperio.
13 Talibus et quamquam non sum praefulgidus instar,
14 me tamen haec pietas ducit in arbitrium,
15 quae facit, ut quaecumque subit per tempora rerum
16 grata, recens habear fervidus obsequiis,
17 atque libens patior tanto pulsatus honore,
18 Quem praecone beat gloria multiplicem.
19 Pleias ab Haemoniis quondam labefacta pusillis
20 maxima pro meritis dona dedit minimis ;
21 [clara Matuntheis etiam pia munera lustris
22 opplevit Rhodopes inscia Parthenopem.]
23 Divus Alexander parvis donatus erinis
24 obtulit in Scythiis oppida Merotiden.
25 Et nos haec eadem grati monimenta daremus
26 usque viri tantis consona mysteriis,
27 sed tenues adsunt nimium, carissime, vires,
28 frater, et insignes debilitant animos :
29 Braccius at quicquid tamen est tibi deditus omni
30 tempore gratari percupit ulterius.